

## Convenio de colaboración entre o Parlamento de Galicia e a Federación Galega de Bancos de Alimentos (FEGABAN) para o desenvolvemento dunha campaña informativa sobre as actuacións dos Bancos de Alimentos

### REUNIDOS

O Excmo. Sr. D. Miguel Ángel Santalices Vieira (DNI nº 34914062G), na súa condición de presidente do Parlamento de Galicia (CIF nº S1533001B), actuando ao abeiro das facultades que lle confire o artigo 31.1 do Regulamento da Cámara do Parlamento de Galicia,

D. José Pita Chento (DNI nº33199205Q), presidente da Federación Galega de Bancos de Alimentos (CIF nºG32375115), que actúa ao abeiro das facultades outorgadas polo artigo 21 dos Estatutos da entidade.

Ambas partes recoñecen a súa competencia e capacidade para formalizar o presente CONVENIO DE COLABORACIÓN, e para tales efectos,

### EXPOÑEN

**Primeiro.** A Federación Galega de Bancos de Alimentos, organización independente sen ánimo de lucro baseada no voluntariado, ten como obxectivo principal a consecución e aproveitamento dos alimentos excedentarios con intención de facelos chegar ás familias e ás persoas necesitadas.

Baixo os principios éticos da distribución gratuíta, a contribución á sostibilidade e preservación do medio, e a promoción da solidariedade e a cohesión social, FEBAGAN ten marcados como fins da súa actuación, entre outros, educar e concienciar sobre a problemática alimentaria, desenvolver a conciencia solidaria, instalando o "principio de responsabilidade social compartida", con campañas de sensibilización dirixidas cara á opinión pública, involucrar ao sector empresarial, comprometéndoos en accións de responsabilidade social, promover e difundir as solucións posibles para superar a problemática da fame, ou promover a participación do voluntariado, unha solidariedade activa e responsable.

Para o cumprimento destes fins FEGABAN quere desenvolver unha campaña para facer chegar á sociedade de Galicia, as actuacións e a labor solidaria que de cotío desenvolven os Bancos de Alimentos, que achegue á cidadanía información sobre as actuacións e campañas que realiza, como a operación Kilo, o reparto do FEAGA, ou a distribución do FOGGA, e que axude á captación de voluntarios para as áreas de actuación dos Bancos de Alimentos.

**Segundo.** O Parlamento de Galicia, órgano constitucional ao tenor do artigo 152.1 da Constitución, e Institución básica de Galicia, poder público do sistema político galego, tal e como se desprende dos artigos 9 e 10 do Estatuto de Autonomía, ten autonomía para celebrar os acordos que lle possibiliten o desenvolvemento eficaz e eficiente das funcións que estatutariamente lle corresponden.

Comprometido, como está nesta X Lexislatura, co fomento de proxectos, programas e actuacións que no ámbito político, económico, cultural e social, activen, reforcen ou consoliden ese espírito solidario que tanto nos caracteriza como galegos, sinte a obriga de participar activamente nesta campaña, promotora da desinteresada labor que desenvolven os Bancos de Alimentos, en favor dos colectivos especialmente máis vulnerables, logo da profunda crise que acabamos de vivir, e da que aínda senten as consecuencias.

**Terceiro.** Na memoria que consta no expediente, xustifícase a concesión directa de subvención no innegable interese público e social que supón a labor dos Bancos de Alimentos e, en consecuencia, a posta en marcha da campaña.

Tendo mutuo interese ambas partes no éxito do proxecto, acordan asinar este Convenio de colaboración que se rexerá polas seguintes

## CLÁUSULAS

### Primeira. Obxecto do convenio

O presente convenio ter por obxecto establecer os mecanismos de colaboración entre o Parlamento de Galicia e a Federación Galega de Bancos de Alimentos, para o desenvolvemento dunha campaña informativa sobre as actuacións dos Bancos de Alimentos.

Esta campaña pretende achegar á sociedade galega información sobre a actividade e a captación de voluntarios para as áreas de actuación dos Bancos de Alimentos (Operacións Kilo, reparto do FEGA, distribución do FOGGA, etc...).

En cada provincia impartiranse charlas en colexio maiores, facultades, institutos etc., e subministraranse folletos informativos nas liñas nas que actúan: subministración de alimentos ás persoas mais desfavorecidas da sociedade e loita contra o malgasto alimentario.

O desenvolvemento da campaña inclúe aluguer de material audiovisual, material ofimático, cartelaría e publicidade en prensa, radio e televisión.

### Segunda. Declaracións e Obrigas das partes

A) FEGABAN declara:

- 1º. Que non esta incurso en ningún dos supostos de prohibición do artigo 13 da lei 38/2003 nin do artigo 10 da lei 9/2007 de subvencións de Galicia
  - 2º. Acredita estar ao día das obrigas tributarias e coa Seguridade Social
  - 3º. Que cumprirá cos termos do convenio xustificando o importe da achega no prazo e coa documentación seguinte, que remitirá ao Parlamento de Galicia:
    - Memoria da actuación xustificativa con indicación do destino dado aos fondos aportados polo Parlamento de Galicia nos termos da cláusula seguinte.
    - Relación clasificada dos gastos executados no período subvencionado: con identificación do acredor e do documento, o seu importe, data de emisión e data de pago, xunto con copia das facturas e dos abonos vía transferencia (en calquera caso as de importe superior a 1.000,00 € bastando para as de contía inferior o recibí do preceptor se o pago foi en metálico, con indicación do DNI, sinatura e nome e apelidos deste). Enténdese por período subvencionado dende a sinatura deste convenio ata o 30 de novembro de 2017.
    - Certificados de estar ao corrente coas obrigas tributarias e coa Seguridade Social
    - Certificación acreditativa do representante legal da entidade da non obtención de axudas solicitadas e/ou percibidas para esta actividade.
- Esta axuda é incompatible con outras axudas para esta actuación concreta, con independencia dos fondos propios da entidade que se precisen.
- Declaración asinada polo representante legal da entidade, de que esta non deduce nin compensa o IVA das subministracións ou servizos que solicita.

- Acreditación da publicidade da achega do Parlamento (fotografías, dípticos, web,...)
- Certificado da conta bancaria a nome da entidade en que efectuar o pagamento.

O prazo para a achega de toda a documentación remata o 4 de decembro de 2017.

B) FEGABAN desenvolverá a campaña informativa sobre as actuacións dos Bancos de Alimentos e o Parlamento de Galicia colaborará co financiamento do seu custe ao abeiro da normativa aplicable en materia de subvencións, nos termos da cláusula seguinte.

O Parlamento de Galicia non asumirá, por motivo deste Convenio, ningún tipo de relación mercantil ou contractual coas persoas que participen na campaña, que corresponderán enteiramente a FEGABAN.

### Terceira . Financiamento

O Parlamento de Galicia financiará o proxecto con 12.000,00 €, con cargo á aplicación orzamentaria 01.01.111B.481.02" subvencións a entidades de carácter social"

Os fondos dedicaranse a afrontar os custes de realización e adquisición de folletos, aluguer de material audiovisual, material ofimático, cartelería e publicidade en prensa, radio e televisión.

Unha vez presentada en tempo e forma pola entidade a documentación xustificativa, será obxecto de control financeiro e aprobarase, previo informe da Intervención, mediante Resolución da Presidencia.

De resultar finalmente inferior o custe da actividade ou xustificarse correctamente nun importe inferior, a subvención a abonar reducirase á dita contía.

O incumprimento da obriga de xustificar o gasto subvencionado dará lugar á perda da subvención concedida na parte non xustificada. De non xustificarse axeitadamente seguirase o procedemento establecido no artigo 42 da lei xeral de subvencións.

### Cuarta. Duración

Este Convenio de colaboración estará vixente durante o tempo necesario para o desenvolvemento da campaña, que en todo caso non poderá estenderse máis alá do 31 de decembro de 2017, data en que deberá estar xustificado o gasto pola entidade, fiscalizado e resolto o pagamento, se procede.

O convenio extinguirase polo cumprimento do seu obxecto ou por incorrer en algunhas das causas de resolución da cláusula oitava.

### Quinta .- Difusión da colaboración das partes

Na actividade obxecto deste convenio farase constar a colaboración das partes e utilizaranse, cando proceda, a identidade corporativa de cada unha das Institucións.

A sinatura deste Convenio supón o consentimento expreso de ámbalas partes para facer públicos a través dos diarios oficiais que procedan e das respectivas webs, os datos referidos ao seu contido de conformidade coa normativa sobre transparencia e boas prácticas que sexa de aplicación a cada unha delas.

### Sexta. Comisión de Seguimento

Coa finalidade de asegurar o cumprimento deste Convenio, crearase unha comisión de seguimento composta por un representante de cada unha das Institucións, que coordinará o seu

desenvolvemento e estará facultada para resolver cantas dúbidas puidesen xurdir na súa execución; poderá estar asistida polos técnicos que xulguen necesarios.

Os acordos adoptados pola Comisión serán inmediatamente executivos.

Terá, ademais, as seguintes funcións:

- A interpretación do convenio.
- A proposta de addendas ou modificacións.
- Informe previo á resolución por incumprimento.
- Facultades de supervisión da execución e adopción das decisións e ditado das instrucións necesarias co fin de salvagardar a correcta realización das actividades acordadas.
- Calquera outra relacionada co bo funcionamento deste Convenio.

#### **Sétima.- Modificación**

As partes, ou a comisión de seguimento, poderán instar a modificación deste Convenio en calquera momento. Mediante addenda achegárase as modificacións sobre o seu contido acordado pola partes.

As propostas de modificación deberán ser comunicadas por escrito cunha antelación dun mes.

#### **Oitava. Resolución.**

Serán causas de resolución deste convenio:


- O transcurso do seu prazo de vixencia sen terse acordado a súa prórroga.
- O mutuo acordo entre as partes.
- A denuncia de calquera das partes, formulada cun mes de antelación e por causas xustificables.
- O incumprimento total ou parcial das cláusulas contidas neste convenio.
- Por decisión xudicial declaratoria da nulidade do convenio.

#### **Novena. Réxime xurídico.**


Este convenio ten natureza administrativa e rexeráse pola Lei 40/2015, do 1 de outubro, de réxime xurídico do sector público; e as cuestións litixiosas que poidan xurdir na interpretación e cumprimento do presente convenio de colaboración serán de coñecemento e competencia da orde xurisdiccional do contencioso-administrativo.

Asemade rexeráse pola normativa aplicable en materia de subvencións.

En proba de conformidade asínase este convenio por triplicado en Santiago de Compostela o 12 de setembro de 2017.



**D. Miguel Ángel Santalices Vieira,**  
presidente do  
Parlamento de Galicia



**D. José Pita Chentó,** presidente da  
Federación galega de bancos de alimentos

